


ALAHADY PAKA II - TAONA D2019



« Raiso ny Fanahy Masina: ny fahotana izay havelanareo dia ho voavela, ary izay hotananareo dia ho voatana » (Jo. 20 : 23) »

Vakiteny I : Asa 5, 12-16
Tononkira : Salamo 115
Vakiteny II : Apôk. 1, 9-11a. 12-13. 17-19
Evanjely : Jo. 20, 19-31

Ry Kristianina havana, mbola anatin'ny herinandro fankalazana ny Paka isika. Namakivaky ny havalona masina isika nanomboka ny alatsinainy ny Paka ka tonga amin'izao Alahady faharoa ny Paka izao. Antritantrerin'ny tenin'Andriamanitra arosan'ny Eglizy ho antsika ho sakafo mamelona ny fototry ny finoantsika dia I Jesoa nandresy ny ratsy ka nitsangan-ko velona. Tafatsangan-

ko velona tokoa ny Tompo, Aleloia. Ny Aleloia dia fankalazana ny fandresen'Andriamanitra. Izany no hibanjinintsika miaraka amin'ireo tenin'Andriamanitra amin'izao Alahadin'ny famindrampo, faharoan'ny Paka izao. I Papa Md Joany Paoly II no nampisongadina ny Alahady faharoa ny Paka hibanjinantsika bebe kokoa ny famindrampontan'Andriamanitra satria io no vokatry ny fitsanganan-ko velona. Noho ny famindrampontan'Andriamanitra sy ny fifamelon-keloka dia miditra ao amin'ny fiadanan'Andriamanitra isika, tsy ny fiadanan'izao tontolo izao fa fiadanan'I Jesoa Kristy. Tonga zanak'Andriamanitra isika, tonga fianakaviamben'Andriamanitra.

Avy amin'ny Fon'i Jesoa nolefonina nisy rano sy rà nivoaka avy tao ka teraka ny eglizy, fianakavian'Andriamanitra isika ary vaovao mahafalin'ny Paka izany. Ny Papa Fransoa mamerina matetika fa tsy ho hisy amin'ny ivon'ny fiainantsika ny fahandriam-pahalemana sy ny fiadanana raha tsy misy fifamelon-keloka sy famindrampo. Ho eo anivontsika ny fiadanana raha mampanjaka ny famindrampo isika. Araky ny fantantsika I Md Joany dia manantitrantitra mandrakariva fa rehefa tafatsangan-ko velona i Jesoa ka nihaona tamin'ny mpianany, isaky ny mifankahita amin'izy ireo izy dia milaza *“Ho aminareo anie ny fiadanana”*. Rarintsika ho antsika koa izany satria ny fiadanana no vokatry ny Paka. Teny fiarahabana nataon'i Jesoa tamin'ny mpianany ny fiariana fiadanana izay antsoina koa hoe fiarahabana apôstôlika. Atolotra ho antsika izany tsodrano firariana fiadanana izany isaky ny manomboka ny Eokaristia isika satria ny Eokaristia dia ankalazantsika ny Paka izany hoe fandalovana miala tamin'ny fiainana taloha izay mamatopatotra antsika ka miditra amin'ny fiainam-baovao feno fiadanana'i Kristy.

Ny evanjely androany manambara amintsika fa faly ireo mpianatra naheno ny fiarahaban'i Jesoa fa indrisy I Tomà tsy teo. Vaovao mahafaly izany, tsy hoe I Tomà tsy teo na tsy nino no vaovao mahafaly fa ny faneken'i Tomà, izy no azo lazaina fa solontenantsika mianakavy nanao ny fiekem-pinoana. Matetika misy fisalasalana ny fiainantsika na dia te hino ny fandresen'i Jesoa ny fahafatesana aza, matetika isika tsy mino raha tsy mahita porofo ka mametrana ny tanantsika tahaka ny nataon'i Tomà dia tsy mino isika. Nony afaka havalooana, raha mbola nivory tao an-trano ihany ny mpianany sady teo koa i Tômà, dia tonga i Jesoa, nefa nirindrina ny varavarana. Nitsangana teo afovoany Izy ka nanao hoe: *“Ho aminareo anie ny fiadanana!”* Ary hoy Izy tamin'i Tômà: *“Ataovy eto ny rantsan-tananao, ka zahao ny tanako, ary arosoy ny tananao, ka atehefo eto amin'ny tratrako; dia minoa, fa aza malain-kino”*. Dia namaly i Tômà ka nanao taminy hoe: *“Tompoko sy Andriamanitra!”* Fa hoy i Jesoa taminy: *“Nno ianao, ry Tômà, satria nahita Ahy; sambatra izay tsy nahita ka nino”*. Tsy nikasika akory aza I Tomà dia nino, izany no hasambarantsika dia ny asa vokatry ny Fanahy masina, ny finoantsika, ny fiadanana nentin'i Kristy hiraintsika ka miombona amin'Andriamanitra isika, izany no fahamasinana. Izany no ankalazaina amin'izao Alahady faharoa fankalazana ny Paka izao.

Henontsika tamin'ny vakiteny voalohany fa niray saina sy niray fo izy ireo. Ny fiombonana dia vokatry ny fandresen'ny ratsy, vokatry ny fiadanana, vokatry ny fifamindrampo sy fifamelan-keloka. Niray fo ny mpino rehetra nankalaza an'Andriamanitra. Izany no lazaintsika raha mamerimberina isika fa Katolika dia halaliniko ny finoako, Katolika aho ankalazaiko ny finoako, Katolika aho mandray an-tànana ny finoako, Katolika aho zaraiko ny finoako, Katolika aho manompo ireo mpiara-belona amiko. Voalaza ao amin'ny taratasin'ny Asan'ny Apôstôly amin'ny vakiteny voalohany izany. Raha nandresy ny ratsy isika dia tsy hisy ny efitrefitra izay avy amin'ny avonavona ao amintsika, ny fialonana avy ao amintsika, ny fitiavan-tena no mamorona ny rindrina fa I Jesoa kosa nandrava an'izany rehetra izany. Fasana foana no hitan'ireo vehivavy izay namonjy ny fasana tamin'ny Alahadin'ny Paka. Izany koa no mbola vokatry ny finoana amintsika raha milaza ny fasana foana, dia foana ireo rindrina sy efitrefitra fa oloaraiky ao amin'Andriamanitra isika vokatry ny famindrampontan'Andriamanitra sy famelan-keloka omen'Andriamanitra.

Manamafy I Md Joany amin'ny taratasiny rehefa nandalina izany rehetra izany izy ka noentanin'ny Fanahy masina izay mino fa I Jesoa Kristy dia nateraka avy amin'Andriamanitra. Fahaterahana

vaovao ny Paka, zava-boahary vaovao tokoa isika, Eglizy Olona Velona isika vokatry ny Paka ka manorina Eglizy Tranon'Andriamanitra izany hoe ilay tranoben'Andriamanitra, ny tontolo iainantsika dia voakolokolo tsara, izany no fanantenana. Ny tontolom-pifandraisantsika sy ny tontolom-piainantsika dia tsy misy efitrefitra intsony satria rava izany rehetra izany ka olombaovao ao amin'i Kristy isika, oloaraiky amin'Andriamanitra isika ka zary génération mpanorina ny tranon'Andriamanitra, zavaboahary vaovaon'Andriamanitra isika, zanak'Andriamanitra isika ka tonga ho génération vaovao miaraka amin'i Tomà milaza "Tompoko sy Andriamanitra" ka hirahina isika ho mpamafy fanantenana, ho mpamafy fiadanana miaraka amin'i Papa Fransoa sy Notre-Dame de la route. Ary tsy mitsahatra isika fa indrindra ny tanora mampiasa ny "chapelle portable" dia ny sapile izay entintsika hamafazana izany fanantenana sy fiadanana izany. "Semeur de paix et d'espérance " miaraka amin'ny Papa Ray masina isika. Amen

Mompera Arsevka Benjamin Ramaroson